

Patent Ductus Arteriosus


Leina:

1. Patent ductus arteriosus

Tlhalošo:

Na Patent Ductus Arteriosus ke eng?

Ductus Arteriosus gantši e hwetšwa go ngwana pele ga ge ngwana a ka belegwa. Ye ke phaephe yeo e thušago ngwana go phologa ge a le ka mpeng ya mmagwe. E swanetše e tswalele ka pejana morago ga gore ngwana a belegwe. Go bana ba bangwe, kudukudu go bao ba tlogo pele ga nako, ga e ke e tswalelela, gomme e bitšwa Patent (open) Ductus Arteriosus. Patent Ductus Arteriosus (PDA) ke phaephe yeo e kgokaganyang Aota go ditšhika tša Pulmonary. Se se ra gore madi a mangwe a sepela ka tsela ya go se be ya maleba, ka gore a sepela ka PDA go ya maswafong sebakeng sa gore a sepele ka mmele.



Na ditlamorago tša Patent Ductus Arteriosus ke dife?

Madi ao a elelago ka tsela ya go se be ya maleba ka yona phaephe ye a dira gore madi a mantši a ye ka maswafong. Madi a a go feta tekano ka maswafong a gobatša maswafo gomme a dira gore go be le koketšego ya kgatelelo ka maswafong. Se se dira gore ngwana a phele a tshwenywa ke malwetši a kgara gomme malwetši a mohuta o a nale gona go tshwenya bana ba bangwe go feta ba bangwe. Go elela go go feteletšeng ga madi go dira gore pelo e šome ka maatla go feta ka mo e swanetšego go šoma ka gona, gomme ngwana o lapa gabonolo. Se se ra gore ngwana gantši o palelwa ke go fetša dijo tša gagwe, o tšwa kudumela ge a eja gomme ga a be le mmele ka tshwanelo. Ge ductus arteriosus e ka se tswalele, gona malwetši a pelo a ka hlolega ka gare ga pelo, gomme se se ka hlola le lona lehu.

Go bana ba bangwe bao ba nago le malwetši ao a tseneletšego a pelo, Patent Ductus Arteriosus (PDA) e ka ba le mohola. E ka dumelela madi go elelela ka maswafong ge go se tsela ye nngwe yeo madi a ka yago ka gona maswafong, goba gona go dumelela madi go elelela mmeleng ge tsela ya maleba e tswalelegile. Go mabaka a go swana le a, ngaka e tla leka go dira gore PDA e dule e bulegile go fihlela ge go ka dirwa opareišene gore go lokišwe goba gona go kaonafatša kotsi ye e tseneletšego ya bolwetši bja pelo.

Na Patent Ductus Arteriosus e ka alafšwa bjang?

Go masea ao a sa tšwago go belegwa go na le sehlare seo se ka šomišwago go leka go tswalelela PDA. Ge se se sa šome, gona PDA e ka tswalelwa ka go dira opareišene, goba ge go le maleba, ntle ga go dira opareišene ka laboratoring yeo go lekolwago ge eba go bolokegile go ka dira opareišene ya mohuta o.